

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : DR. MANSOR BIN ABD RAHMAN [ SIK ]**  
**TARIKH : 6 APRIL 2015 (ISNIN)**

**DR. MANSOR BIN ABD RAHMAN [ SIK ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan harga minuman di kebanyakan restoran-restoran atau kedai-kedai makan didapati tidak seragam dan terdapat yang mengenakan dengan harga yang tinggi. Adakah pihak kementerian mempunyai satu mekanisma yang khusus bagi memastikan harga yang dibayar tidak membebankan pengguna memandangkan penyediaan minuman hanya menggunakan bahan asas berbanding penyediaan makanan yang mungkin mempunyai kaedah dan resepi tertentu.

## **JAWAPAN:**

**Tuan Yang Di-Pertua,**

Kerajaan prihatin terhadap isu kos sara hidup yang dibebani oleh rakyat dan sentiasa terus mengambil langkah-langkah yang proaktif untuk membantu golongan bersasar iaitu golongan yang berpendapatan rendah dan sederhana.

Pada umumnya, harga makanan dan minum di kebanyakan restoran adalah tidak sama. Terdapat beberapa faktor yang mempengaruhi keadaan ini dan di antaranya adalah seperti lokasi, jenis perniagaan iaitu sama ada ianya adalah gerai atau restoran, sama ada premis dimiliki atau disewa, bahan mentah untuk penyediaan makanan dan minuman dan lain-lain.

Setakat ini tiada satu mekanisme khusus yang menetapkan harga makanan dan minuman di restoran atau kedai makan. Walaubagaimanapun Kerajaan menyeru kepada semua peniaga supaya dapat menawarkan harga yang berpatutan dan bukannya semata-mata untuk mengaut keuntungan yang tidak munasabah.

Dalam meringan perbelanjaan harian rakyat, Kementerian turut memperkenalkan Menu Rakyat 1 Malaysia atau MR1M di premis-premis makanan seperti kantin, restoran, gerai dan kafeteria termasuklah di Institusi Pengajian Tinggi dan hospital Kerajaan. MR1M menawarkan pakej sarapan pagi dan makan tengahari pada harga yang berpatutan iaitu RM2.00 bagi set sarapan pagi dan RM4.00 bagi set makan tengahari. Manakala di Sabah dan Sarawak pula RM2.50 bagi sarapan pagi dan RM5.00 bagi makan tengahari. Sehingga 27 Februari 2015, sejumlah 4,822 premis telah menyertai MR1M.

Kementerian turut melaksanakan **pemeriksaan dan pemantauan yang rapi dan menyeluruh** ke atas premis/restoran melalui **OPS CATUT**. Mulai 15 Januari 2015 sehingga 3 Mac 2015, sebanyak **8,027 pemeriksaan** telah dilakukan ke atas **gerai makan, 8,683** pemeriksaan ke atas **kedai makan, 4,606** pemeriksaan ke atas **medan selera, 3,560** ke atas **restoran** dan **699** pemeriksaan ke atas **premis di R&R**.

Bagi membendung kenaikan harga yang tidak munasabah oleh peniaga yang tidak bertanggungjawab, **tindakan pengeluaran notis di bawah Akta Kawalan Harga dan Antipencatutan 2011 dilaksanakan** ke atas mana-mana pihak yang didapati menaikkan harga secara mendadak dan ketara. Peniaga yang gagal atau enggan memberi penjelasan terhadap kenaikan tersebut boleh dikenakan tindakan undang-undang dan sehingga 31 Disember 2014, sebanyak **93 notis** telah dikeluarkan.

Justeru itu, melalui langkah-langkah ini, hasrat Kerajaan untuk menangani masalah kos sara hidup yang dihadapi oleh seluruh rakyat Malaysia akibat sikap segelintir kumpulan peniaga yang mengambil kesempatan untuk mengaut keuntungan yang terlalu tinggi dan tidak munasabah terutamanya melibatkan golongan yang berpendapatan sederhana dan rendah dapat dicapai. Ini sudah tentu akan memperbaiki dan seterusnya meningkatkan kualiti hidup golongan tersasar agar dapat menikmati kesejahteraan hidup.